



حوار بين حسنى مبارك وسوزان قبل الانتخابات الرئاسية سنة 2018

سوزان : صباح الخير يا حسنى

حسنى: مين؟

سوزان: هاكون مين؟ سوزان

حسنى : الاخوان؟

سوزان : يوه انت لا بتسمع ولا بتشوف ... قوم خدك حمام

حسنى : انا اكثر واحد باحب السلام

سوزان : الله يطولك ياروح اسمع هاجيبك التليفون تسال على بابا الاقباط
الجديد احنا داخلين على انتخابات

حسنى : انا ما عنديش بنات

سوزان : يادى النيله خد ياعم التليفون انا ضربتك النمره

حسنى : ازيك ياطنطاوى سلامتک ياعم الشيخ

سوزان : اشوف فيك يوم يابعيد . باقوللك بابا الاقباط تقوله يا عم الشيخ
وبعدين طنطاوى مات من زمان قوله سلامتكم يابونا ولازم الاقباط ينتخبونى
واقفل السكه على طول علشان انت هتفضلنا.

سوزان : باقولك ايه يا حسننى مابلاش انت ترشح نفسك المره دى سيب
فرصه لجمال ده ابنك برضه

حسننى : لا الا الانتخابات

سوزان : اشمعنى دى سمعتها على طول على كل حال جمال عجز
وبقت صحتة على قد طيب ها تعمل ايه فى الاخوان

حسننى : انا مش هاتعدى بتنجان

سوزان : يارب توب على انا مش عارفه عزرائيل تايه عنك فين جهز نفسك
هتقول كلمه فى مجلس الشعب وفتحى سرور هييجيبوه من الانعاش على
المجلس على طول و صفوت الشريف معلق المحاليل وهيكون موجود

حسننى : طيب والجدع الطويل قوى ده موجود

سوزان : ايه نسيت نظيف رئيس الوزراء موجود هيروح في انهى دايله اهو
مرزوع بقاله عشرين سنه والقوطه بقت ب100 جنية واللحمه الكيلو
بخمسميت جنية و الناس هتاكلنا . ولا الأذعه احمد عز اللى خلى طن الحديد
ب50000 جنية والناس بقت تبني بالطين على كل حال الشعب نفسه قرب
يخلص روح الحق يشوفوك قبل ما يموتوا كلهم

حسننى : طيب الجدع المطبق اللى ماسك وزارة الحشيش

سوزان : قصدك الجيش مش الحشيش. طنطاوى ياسيدى .هييجيبوه 2
عساكر يحطوه على الكرسي ولما تخلص هييقوا يرجعوه المستشفى

حسننى : طيب خليههم يجهزولى الطياره الحريه هاعمل طلعه جويه على
مجلس الشعب

سوزان : يا اخی اتنيل انت لسه عايش فى الدور هوانت فيك نفس بس
اياكش تلحق توصل وقولهم كلمتين عن البنيه التحتيه وان الحكومه هتوفر
القول والطعميه وهاتخليهم على البطاقه وانك نفذت خمس اسداس البرنامج
الانتخابى وقولهم ان الكنايس الخمسه اللى فاضله فى مصر خط احمر

وماحدث حبيجي ناحيتهم قبل الانتخابات ماتخلص واننا هانصدر قانون دور
العباده الموحد فى دوره الجايه لمجلس الشعب

حسنى : طيب وان سالونى عن فلسطين

سوزان : فلسطين ماخلصت من زمان خديتها اسرائيل. وفتح وحماس
بيتخانقوا على رفح دلوقتى

حسنى : طب وكان فين عمر سليمان

سوزان : تعيش انت من زمان

حسنى : طيب خلصينى علشان عاوز اسافر ليبيا اقابل القذافى

سوزان : القذافى تعيش انت من خمس سنين وابنه اللى مسك الحكم

حسنى : طب ارواح السعوديه عند الملك عبدالله

سوزان : تعيش انت من كام سنه وانت عزيزت فيه

حسنى : طيب اسافر فرنسا اشوف ساركوزى

سوزان : تعيش انت من زمان

حسنى : طيب ارواح امريكا

سوزان : مش عايزين يشوفوا وشك زهقوا منك وانا كمان زهقت منك.خليك
مرزوع هنا وهابعت الدوبلير بتاعك

حسنى : امرك يا حنان

سوزان : سوزان يا حيوان